

**Umno Bukan Parti Provokatif – Saksi
Bernama
21 Mei, 2012**

KUALA LUMPUR, 21 Mei (Bernama) -- Mahkamah Tinggi yang mendengar perbicaraan kes saman malu yang difailkan Pengerusi Badan Perhubungan Umno Pulau Pinang Datuk Zainal Abidin Osman terhadap Ketua Menteri Lim Guan Eng Isnin diberitahu bahawa Umno bukanlah parti bersifat provokatif.

Zainal Abidin, 52, ketika disoal balas oleh Peguam Jagdeep Singh Deo yang mewakili Lim berkata Umno juga bukanlah parti yang mempunyai niat jahat terhadap kerajaan negeri di bawah pimpinan DAP.

Beliau sebelum itu menafikan apa yang ditulis oleh wartawan Malaysian Insider Clara Chooi Ai Leng mengenai kejadian cubaan membakar pejabat DAP akibat isu pembacaan Al Quran sebelum azan subuh pada 18 Ogos tahun lepas.

Zainal Abidin yang dinamakan sebagai plaintif bagi pihak Umno Pulau Pinang berkata beliau hanya mengetahui dakwaan Lim mengenai perkara itu (isu membakar pejabat) menerusi akhbar.

Beliau bagaimanapun mengakui bahawa kenyataan yang dikeluarkan Lim itu telah menimbulkan kegelisahan dan kemarahan orang Islam.

-- BERNAMA

Hak Cipta Terpelihara © 2012 BERNAMA

Source: <http://www.bernama.com/bernama/v6/bm/newsindex.php?id=667631>